



UNIVERSITÄTS-
BIBLIOTHEK
PADERBORN

Universitätsbibliothek Paderborn

Ioannis S. R. E. Cardinalis Bona Opera Omnia

Tribus Tomis comprehensa

Opvscvla Spiritvalia - I. Horologium Asceticum. II. Principia Vitae
Christianae. III. Manuductio ad Coelum. IV. Via Compendii ad Deum. V. De
Sacrificio Missae. VI. De Discretionem Spirituum ... Operum Eminentiss.
Cardinalis, Tom. I

Bona, Giovanni

Parisiis, 1677

Sanctissimo Patri Bernardo Abbati Doctori Mellifluo ...

urn:nbn:de:hbz:466:1-9969

SANCTISSIMO PATRI
BERNARDO ABBATI
DOCTORI MELLIFLUO

Joannes S. R. E. Presb. Cardinalis Bona
indignus Servus & Filius.

NON diu mihi querendum fuit, *cujus potissimum nomine hanc exiguam de discernendis spiritibus lucubrationem inscriberem, quemve illi Patronum accerserem; nam Tu statim occurristi, dulcissime Pater BERNARDE, cujus erga me officia & beneficia multo majora sunt, quàm ut possint paucis perstringi. Ut enim hoc solum commemorem, quod precipuum est, Tibi tueque opi ac tuitioni debeo, quod à teneris annis ab hoc seculo nequam creptus, totum cum pompis ac divitiis suis mundum despiciere didici, filiorumque tuorum cœtui aggregatus melioris vitæ vias eorum exemplo & institutione ingressus sum. Cumque meritò formidarem, ne fructus à me exigens tam grandi cultura dignos, & non inveniens, tanquam arborem infæcundam me succidi, & flammis tradi juberet; Tu Clementissime Pater, degenerem filium non abjecisti, sed rorem divina gratia à fonte omnium bonorum impetrafti mihi, lumenque admovisti, ut discussa caligine in qua volutabar, errores meos discernerem & detestarer. Et hoc paternæ protectioni tuæ deputo, quod inhaerunt præcordiis meis præclara monita & documenta salutis, quibus discipulos tuos diebus vitæ tuæ potenter instruxisti, & delectabar in eis; & hoc indicium divinæ erga me misericordiæ agnoscō & gratias ago, quod verba tua non sicut verba hominis, sed sicut Dei, ut revera sunt, libenter audiebam: à vera siquidem sapientia, quæ Deus est, illa profluxit, quæ in libris tuis mirabiliter elucet. Sive enim Monachos erudis, sive vitia redarguis, sive hæreticos conteris & schismaticos expugnas, sive abdita mysteria pandis, sive gratiam Dei extollis, sive Pontifices instruis, sive Dei dilectionem doces, sive Sanctorum merita celebras, sive*

C. Bona Opusc. Spirit.

T t

negotia pertractas; nihil certè legi potest aut disertius, aut excel-
lentius, aut efficacius ad persuadendum. Vrit, afficit, penetrat
mellifluus sermo tuus: & nardus tua dedit odorem suavitatis,
odorem vitæ in vitam, ab illis dumtaxat percipiendum, quibus
datum est à Patre, testante Filio & dicente; Confiteor tibi Pater,
Domine cæli & terræ, quia abscondisti hæc à sapientibus & prudē-
tibus, & revelasti ea parvulis. Hæc sunt nimirum incerta & occulta
increata Sapientia, quæ non nisi ab illis cognosci possunt, qui spi-
ritum ipsius habent; de quo scriptum est; Spiritus omnia scruta-
tur, etiam profunda Dei. Atque utinam hunc ipse spiritum ha-
buisssem, cum animum appuli ad hæc scribenda; certas etenim
& infallibiles regulas tradidisssem, quibus boni instinctus à ma-
lis, verum lumen à falso & sibilus serpentis à voce sponsi loquen-
tis in silentio ad cor Hierusalem dignoscerentur. Et quidem si Tu
hic esses, tenerem Te & rogarem, ut panderes mihi secretum
tuum, & penderem ex ore tuo, sicut olim discipuli tui; nec du-
bitarem Te verum dicere, quia summa Veritas mihi intus dice-
ret te verum dicere. Nunc verò etsi audio te mutis vocibus lo-
quentem & docentem, vereor ne peccatis meis exigentibus eloquia
oris tui non percipiam; nec doceas me, etiamsi loquaris; neque
enim docēs non intelligentem. Et si quid intelligo, vix me ido-
neum existimo ad hoc ipsum rudi meo sermone explicandum.
Quæ est igitur scientia mea, si nescio utrum aliquid sciam?
Idcirco verbis tuis in hoc tractatu usus sum, aliorumque Pa-
trum qui Te precesserunt, nihil ausus asserere, quod firmissima
eorum auctoritate, sacrarumque literarum irrefragabili testimo-
nio, aut certa experientia non roboretur. Sed Te præ cæteris ma-
gistrum, Te doctorem sequutus sum, cui sublimioris hujus
Theologiæ magisterium divinitus traditum est; adeo ut tibi dis-
plicere non possit hoc qualecunque munusculum, quod in perenne
humillimi mei obsequii & grati erga Te animi monumentum
offero, quia Tuum est, ex tua videlicet sapientia ditissimis thesau-
ris depromptum. Illud igitur excipe & protege paterna benigni-
tate, illorumque mentibus, qui in hunc librum inciderint, divini
luminis obtine claritatem, quæ desuper imbuti æternis rationibus
inhæreant, & mundi ac dæmonis insidiosis susurrationibus des-
pectis in sempiterna Veritatis amore, ejusque beata possessione
conquiescant. Hoc votum meum est, hæc merces operi meo. Ro-
ma, die festo Natalis Tui. MDCLXXII.